

Վարչական տույժ նշանակելու մասին

«17» սեպտեմբերի 2018թ.

ք.Երևան

ՀՀ պետական եկամուտների կոմիտեի հետաքննության վարչության պետ Ա.Քյարամյանս, վերանայելով ՌԴ քաղաքացի Ավագ Վանիկի Սևինյանի վերաբերյալ նյութերը.

Պ Ա Ր Զ Ե Ց Ի՝

2018 թվականի հուլիսի 24-ին՝ ժամը 02⁰⁰-ի սահմաններում, ՀՀ ՊԵԿ ներքին անվտանգության վարչության աշխատակիցները Բագրատաշենի մաքսային կետ-բաժնի տարածքից դուրս գալուց հետո, ելքի ուղեփակոցի մոտ կանգնեցրել են ՀՀ ժամանած, ՌԴ քաղաքացի Ավագ Վանիկի Սևինյանի կողմից վարվող «TOYOTA CAMRY» մակնիշի, Y293EK799 հաշվառման համարանիշի ավտոմեքենան և զննության նպատակով ավտոմեքենան տեղափոխել են մաքսային կետ-բաժնի տարածքում գտնվող խորը զննման անգար և բեռնախցիկից հայտնաբերել Ավագ Վանիկի Սևինյանի կողմից առանց հայտարարագրման ՀՀ մաքսային սահմանով տեղափոխված 14 շիշ ալկոհոլային խմիչք:

Փաստի առթիվ Ավագ Սևինյանի նկատմամբ ՀՀ մաքսային օրենսգրքի 203-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ հայտնաբերված 14 շիշ ալկոհոլային խմիչքը վերցվել և ի պահ է հանձնվել «Ձյունիկ տերմինալ» ՍՊ ընկերության մաքսային պահեստ:

2018 թվականի հուլիսի 24-ին ՀՀ ՊԵԿ Արևելյան մաքսատուն-վարչության Բագրատաշենի մաքսային կետ-բաժնում Ավագ Վանիկի Սևինյանը բացատրություն է տվել այն մասին, որ հուլիսի 24-ին Վրաստանի Սադախլո մաքսային կետի անմաքս առևտրի խանութից գնել է 14 շիշ օղի և առանց հայտարարագրման տեղափոխել ՀՀ մաքսային սահմանով, քանի որ տեղյակ չի եղել, որ այդ քանակությունը գերազանցել է թույլատրելի չափը:

Ավագ Սևինյանը 2018 թվականի սեպտեմբերի 17-ին հրավիրվել է ՀՀ ՊԵԿ հետաքննության վարչություն՝ մասնակցելու իր նկատմամբ ՀՀ մաքսային օրենսգրքի 203-րդ հոդվածով սկսված մաքսային կանոնների խախտման վերաբերյալ գործի վարույթին ու քննությանը և միաժամանակ նախազգուշացվել է, որ չներկայանալու դեպքում ՀՀ մաքսային օրենսգրքի 219-րդ հոդվածի համաձայն՝ վարչական գործի վարույթն ու քննությունը կիրականացվեն առանց իր մասնակցության, սակայն չի ներկայացել:

ՀՀ ԱՆ «ՀՀ Փորձագիտական կենտրոն» պետական ոչ առևտրային կազմակերպության փորձագետի 06.09.2018թ. թիվ 70331810 եզրակացության համաձայն՝ փորձաքննությանը տրամադրված ապրանքներն իրենցից ներակայացնում են թվով 2 հատ «Russian Standart Platinum» տեսակի օղի, որոնց շուկայական արժեքը 2018 թվականի հուլիսի 24-ի դրությամբ կազմել է 21240 ՀՀ դրամ և 12 հատ «Flirt» տեսակի օղի, որոնք չեն գնահատվել, քանի որ ինչպես ՀՀ շուկայում, այնպես էլ «Duty Free» խանութներում դրանց վաճառքի վերաբերյալ տվյալներ չեն հայտնաբերվել:

Վարչական վարույթի ընթացքում հարցում է կատարվել ՀՀ ՊԵԿ մաքսային հսկողության վարչություն, որտեղից ստացված 12.09.2018թ. թիվ 8-1/[1792964]-18 գրության համաձայն՝ ալկոհոլային խմիչքների՝ ոչ ԵԱՏՄ երկրներից ՀՀ ներմուծման դեպքում չեն կիրառվում ոչ սակագնային կարգավորման միջոցներ, իսկ 2 հատ «Russian Standart Platinum» տեսակի օղու մաքսային արժեքը 2018 թվականի հուլիսի 24-ի դրությամբ կազմել է 9504 ՀՀ դրամ, մաքսային վճարների չափը՝ 12252 ՀՀ դրամ:

ԵԱՏՄ մաքսային օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ մաքսային ներկայացուցիչի կողմից, եթե սույն օրենսգրքով այլ բան սահմանված չէ: Մաքսային հայտարարագրումն իրականացվում է գրավոր և (կամ) էլեկտրոնային եղանակով: ԵԱՏՄ մաքսային օրենսգրքի 105-րդ հոդվածի համաձայն՝ մաքսային ընթացակարգերով ձևակերպելիս, բացառությամբ «մաքսային տարանցում» մաքսային ընթացակարգի, մաքսային մարմին է ներկայացվում ապրանքների մասին հայտարարագիր: Օրենսգրքի 110-րդ հոդվածի համաձայն՝ միության մաքսային տարածք ներմուծվող ապրանքների մասին մաքսային հայտարարագիրը ներկայացվում

է մինչև ապրանքների ժամանակավոր պահպանման ժամկետի լրանալը կամ սույն օրենսգրքով սահմանված այլ ժամկետում: Միության մաքսային տարածքից արտահանվող ապրանքների մասին մաքսային հայտարարագիրը ներկայացվում է մինչև Միության մաքսային տարածքից դրանց մեկնումը, եթե սույն Օրենսգրքով այլ բան սահմանված չէ: ԵԱՏՄ մաքսային օրենսգրքի 2-րդ հոդվածի 7-րդ կետի համաձայն՝ հայտարարատուն այն անձն է, որը հայտարարագրում է ապրանքներ կամ որի անունից հայտարարագրվում են ապրանքներ, իսկ 35-րդ կետի համաձայն մաքսային հայտարարագրումը մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ եւ (կամ) ապրանքների բացթողման համար անհրաժեշտ այլ տեղեկությունների հայտագրում է: ԵԱՏՄ մաքսային օրենսգրքի 83-րդ հոդվածի համաձայն որպես մաքսային ընթացակարգերով ձևակերպվող ապրանքների հայտարարատու կարող է հանդես գալ՝ անդամ պետության անձը՝ որն օտարերկրյա անձի կետ կնքված այն գործարքի կողմերից է, որի հիման վրա ապրանքները տեղափոխվում են Միության մաքսային սահմանով, որի անունից և (կամ) որի հանձնարարությամբ կնքվել է նշված գործարքը, որն ունի ապրանքների տիրապետման, օգտագործման և (կամ) տնօրինման իրավունք, եթե ապրանքները Միության մաքսային սահմանով տեղափոխվում են այն գործարքի շրջանակներից դուրս, որի կողմերից մեկն օտարերկրյա անձ է, որը Միության մաքսային տարածքում գտնվող օտարերկրյա ապրանքների մասով օտարերկրյա անձի կամ անդամ պետության անձի հետ կնքված գործարքի կողմերից է: Օրենսգրքի 84-րդ հոդվածի 2-րդ կետով սահմանված են հայտարարատուի պարտականությունները, այն է՝ կատարել ապրանքների մաքսային հայտարարագրում, մաքսային մարմին ներկայացնել մաքսային հայտարարագրում հայտագրված տեղեկությունները հաստատող փաստաթղթեր, ներկայացնել հայտարարագրվող ապրանքները և վճարել մաքսային վճարները, իսկ 3-րդ կետի համաձայն հայտարարատուն անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ հայտագրելու, ինչպես նաեւ մաքսային ներկայացուցչին անվավեր, այդ թվում՝ կեղծ և (կամ) ակնհայտ ոչ հավաստի (սուտ) տեղեկություններ պարունակող փաստաթղթեր ներկայացնելու համար:

Այսպիսով, նյութերով պարզվել է, որ 2018 թվականի հուլիսի 24-ին ՌԴ քաղաքացի Ավագ Վանիկի Սևինյանը առանց հայտարարագրման ՀՀ մաքսային սահմանով տեղափոխել է 14 շիշ օղի, ինչը առաջացրել է 12252 ՀՀ դրամ չհաշվարկված մաքսային վճարներ, այսինքն՝ Ավագ Վանիկի Սևինյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ նախատեսված մաքսային կանոնների խախտում, այն է՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում առաջանում է մաքսային վճարների պակաս հաշվարկում կամ չհաշվարկում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, ՀՀ ԱՆ «ՀՀ Փորձագիտական կենտրոն» պետական ոչ առևտրային կազմակերպության փորձագետի 06.09.2018թ. թիվ 70331810 եզրակացությամբ և ՀՀ ՊԵԿ մաքսային հսկողության վարչության 12.09.2018թ. թիվ 8-1/[1792964]-18 գրությամբ և Ավագ Սևինյանի բացատրությամբ:

Ո Ր Ո Շ Ե Ց Ի՝

1. Ավագ Վանիկի Սևինյանին (ՌԴ քաղաքացի, բնակվող՝ ք. Մոսկվա, Ենիսեյսկայա փող., 22-րդ շ., բն. 156-րդ, անձնագրի համար՝ 7758674442) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ և նրան տուգանել չհաշվարկված մաքսային վճարների 50 տոկոսի չափով՝ 6126 ՀՀ դրամ:

2. Որոշման մասին հայտնել Ա.Սևինյանին, պարզաբանելով, որ այն կայացնելուց հետո 10 օրվա ընթացքում կարող է բողոքարկել վերադաս մաքսային մարմին (ՀՀ մաքսային օրենսգրքի 222-րդ հոդվածի 2-րդ մաս) կամ երկամսյա ժամկետում՝ վարչական դատարան (ՀՀ վարչական դատավարության օրենսգրքի 72-րդ հոդվածի 1-ին մասի 1-ին կետ):

**ՀԵՏԱՔՆՆՈՒԹՅԱՆ
ՎԱՐՉՈՒԹՅԱՆ ՊԵՏ**



Ա.ՔՅԱՐԱՄՅԱՆ